



Itilliarsoop ikerasaliortfigineqarnissaa piviusunngorteqqullugu Naalakkersuisut suliamik aallartsitseqqullugit peqquneqarnissaannik Inatsisartut aalajangiiffigisassaattut siunnersuut.

Isissusilerneqarlunilu silissusilerneqassaaq.

(Inatsisartunut ilaasortaq Anders Olsen, Siumut)

(Siullermeerneqarnera)

Inatsisartunut ilaasortaq Anders Olsen siunnersuuteqarneranut qutsavigaarput, arlaleriarluni siusinnerusukkut maani Inatsisartuni oqallisigineqartareersumut.

Tunngaviatigut siunnersuuteqartoq isumaqatigaara, isumassarsiatsialaasoq Itilliarsummi nutaamik ikerasaliornissaaq. Kujataani attaveqaqatigiinnermut pitsanngorsaataassaaq, qularutigingilaralu, piffimmiittunut nutaamik ikerasaliorneq qujarutissagaat.

Ima iluatsitsitigaagut, siusinnerusukkut sukumiisumik misissuisoqareersimalluni, ersarissumik takutitsisumik, aningaasat qassit atorneqassanersumik siunnersuutip piviusunngortinneranut. Misissueqqaarnerit pilersaarusionerillu ilanngullugit aningaasaliissutissat pisariaqartinneqartut missangerneqarsimapput 60 millioner koruunit ataatilaarlugit amerlassuseqassasut.

Taamaattumik tamanna iluatsillugu siunnersuuteqartoq piumaffigerusuppara ersarissumik nalunaarutigeqqullugu, siunnersuut qanoq aningaasalersorneqarniarnersoq. Aammalu siunnersuuteqartoq apererusullugu nunatta karsia kisimi, akiliiniarnersoq imaluunniit naatsorsuutigineraa, Kommune Kujalleq aningaasaleqataassasoq?

Demokraatit isumaqarput, pingaartuusoq, ataatsimiititaliap sulinissamini aamma ukkatarissagaa, siunnersuut qanoq aammalu kimit aningaasalersorniarnersoq.

Siunnersuut taamatut oqaaseqaaserlugu Sanaartornermut Ataatsimiititaliami suliareqqinneqarnissaanut innersuunneqarpoq.